

梅亭先生四六標準

梅亭先生四六體集

梅亭先生四六標準卷之二

太守

賀趙尚書知平江府

改述

通班鴻閣作牧吳門厭承明之勞出領黃堂之寄
游嬉蘇之勝請吟畫戟之詩和氣先庚而已孚驩
聲旁午以交慶恭惟某官飄然無敵富爾不群重
祿勸親亦既曳星辰之履大宗維翰乃欲超江海
之麾尺一之留甚堅再三之請彌力君陳順我后
于內寧煩更尹於東郊召公繫諸侯之屬何事
分於西陝登以瀛洲之秩試之馮翊之邦月滿一

輪虎丘幸甚河潤九里鳳闕賴之無以我公歸兮
恐須衮繡有安社稷臣者宜在廟堂某全抱迂踈
獨蒙賞識燕巢于幕正有望於捲簾鴻漸于般今
若爲而遵渚然感恩正在於知己則受德豈待於
成身使相國賜之相國禮之則韓愈亦人耳此執
事事也執事責也於蘇洵何有哉

賀李參政知遂寧府

璧

升班書殿宅牧价藩入爲帝王師難戀洞霄之香
火出補父兄處重尋川路之風煙民說無涯公歸
有漸恭惟某官材全而業鉅學廣而聞多伯夷待

天下之清一星終矣伊尹得聖人之任四海信之
若爲聽文德之麻尚使分武信之竹周公主陝曷
嘗瑕公孫之碩膚山甫徂齊殆欲續祖考之明哲
然有撫四夷之急能無先一州之疑向參耐官或
謂恐任宣威之寄寇公暫撫不如歸圖答虜之勲
所謂真儒無敵之功豈容匹夫不被其澤某聞報
失喜捲書欲狂眉山之見端明不但願出陳黃之
派洛社之起司馬庶幾卒成遼夏之盟

賀寶慶李知府到任大謙

錫命堯符開藩龍邱鄴侯出守街苦李之盤根召

伯來宣新甘棠之美蔭驩騰千里喜溢四隣恭惟
某官筆橐世臣箕裘家學稟衡嶽之淑氣真磅礴
而扶輿沆瀣溪之 光風聊逍遙兮容與旣贊星
輶之畫又司天塹之糧所去見思厥臨孔惠自合
歸軒墀之供奉願猶試田里之循良惟此三湘壯
哉二邵考姚合之句夸五雲才子之除參韓翃之
詩詫萬里滄波之勝矧今新府密邇故鄉汎掃松
楸宿舂糧而可至綿聯桑梓晝衣綉以何殊暫擁
戟香亟遄圭覲某漫爲佐貳正託附庸向忻一識
於荊州今幸再依於劉表偶欲叱峽之馭難隣燭

之久分尚或濯滄浪之纓叙宗盟而後去

賀虞漢州

公著

代月湖

渙奉恩綸復紆郡組紫樞黃閣蓋舊物之青氍紅
旆碧油又凝香於畫戟置爲歛惠會即疇庸恭惟
某官父教之忠仕優則學識其小者指爲東閣之
郎君見而知之始信西州之奇士勞心兩郡袖手
四年茲奉板輿之親仍分竹符之使維今廣漢實
古雒城登橋而訪君平探河漢之遠派臨池而憶
諸葛懷宇宙之大名無疑牛鼎之烹雞政使蟻封
而試馬佇策勲於召杜歸接武於韋平某舊及同

僚新聞報政老驥真老空歌挽士不能寸之詩冥
鴻未冥猶見治平爲第一之召

賀太平字文守

紹彭

恭審輟賢中臺作牧上郡引嫌得請辭兄弟並相
之榮歛惠承流新父母斯民之政雙旌戾止五袴
煖然恭惟某官氣稟岷峨家傳莘渭抗旃出使勇
登老上之庭持節來歸亟荷甘泉之橐惟時重鎮
孰若當塗爰分半竹之符小憇甘棠之蔭朱轡皂
蓋暫凝畫戟之香黃閣紫樞自是青氈之舊某取
違未久遣賀猶稽方國一札之成寧須符合刺史

三公之入即佇袞歸

代羅司法

有開

上撫州林守

呂

一官待戍頗安塵土之卑千里懷賢未快雲天之
觀忘越國過都之遠失檐簷躡蹻之勞宋之滕而
踵門若爲藉手何與韓之同業庸可潔身不然凝
清兵衛之香視此卑陬法曹之掾無謂而謁匪狂
則諛恭惟某官德宇浚明性資凝遠深造自得獨
扛百斛之龍文幼學壯行連舉八科之麟角諸老
未能言者天子居然器之影組西崑不受人間之
風日總書東壁漸摩天上之星辰六鰲忽戴於瀛

洲五馬遄驅於汝水穿天出月續康樂之詩章貫
日凌霜儲平原之氣節無多借寇會即詔黃功名
刺跨於數公史冊相期於千載某地寒無挾天稟
甚慳童而習之偶成蠅於誤筆齒已長矣僅得雉
於鳴廬欲留久遠之看恐未遺餘之補渠其繞樹
何所託根柱笏而看西山幸遲瓜代挂席而上南
斗徑造棠陰初非商財賄之有無計班貲之崇庠
止欲觀道德於前後聽議論於左右特恐驢鳴之
止一難希馬價之倍三見刺史即周孔之初無他
望與童子慕回路也請在下風

通撫州林知府

澤之

隨鵝鷺之行昔陪朝綴投雞豚之社茲隸氓編未
修負弩之恭敢緩馳牋之敬恭惟某官心旣凝粹
德宇恢通杞梓廊廟之材宜其隆棟璵璠瑚璉之
器而乃潤山粵課民庸入司簿正居然難進而易
退可見特立而獨行厭承明之廬抗嚴助之素志
照臨川之筆尋靈運之舊遊維此偏城雖云凋郡
登瀛平地了無三島之風波擬峴高臺盡領五峯
之煙雨均洪十萬戶之福企望二千石之良亟聽
璽褒式遄圭覲某強名半刺實受一廛拔薤而擊

強宗諒無待任崇之諷索棗而夸新尹但切吟杜
甫之詩

通武岡呂知府

祖烈

典午非材偶躡踐更之次消辰祗戍式嚴事長之
恭半生傾耳以懷賢一旦奉身而佐治斐裁四六
聊具萬分恭惟某官才應時需美兼世濟丹青霖
雨家傳三相之畫圖朱紫風流人敬千鍾之名字
道統聿新於南渡文盟實主於東萊今人莫崇棟
之如蓋優家學故國非喬木之謂正倚世臣乃再
轉而爲丞始一麾而出守由也果賜也達從政裕如

黔之嶺巫之嶠斯民幸甚然稽近比詎許久留式
觀一節之趨入侍九鼎之闢某學未能信祿以代
耕入誨諸生非敢絕吟而停手出延五鬼真成觸
諱於轉喉甘心曝簷日之溫豈意趣屏星之代今
何如昔寧敢爲李膺之大言我不爲公抑豈異呂
虔之嘉贈所幸處治中之任而展其足固有負天
下之望者爲之前風清月明祇望平分於別乘露
繁天豁或容款奉於清談

上知贛州胡尚書

集

聽尚書之履無以公歸分刺史之符徒得君重地

便過家之計天知體國之忠宜奉十行遂倡九牧
恭惟某官篤誠而明允肅括而弘深雲岫無心自
然萬物之吐氣秋竿有節豈以四時而改柯萬人
仰星辰之班六合無風塵之警誰因五單于爭立
之釁遂主十萬衆橫行之謀非上智必英豪談何
容易厭承明勞侍從兆足以行尚煩西清學士之
真俾爲南國諸侯之長牙旗鐵馬虎頭素重於百
城寶帶金魚龍尾仍通於八座納獨峯於臂次攬
八境於毫端富貴歸鄉人知從太守之樂其樂謀
猷告后誰其先天下之憂而憂無疾其驅不諫亦

入某一違約繆五見於絺從軍無分寸之功失勢
有千丈之落落路經灩澦鬢已雙蓬身出褒斜命危
一葉謫甘滿百黜不待三北宮之挫一毫縱無膚
撓東野之失連產轉覺心寒惟是頃者之誤傳或
聞舉之以自代士固伸於知己吾不足以累公巨
源之表嵇康良非素望昌黎之薦侯喜亦足自竒
幸而出大賢之門亦合進小夫之牘實以熏心於
憂患未由奏記於門墻道逢千騎之上頭喜甚六
鼇之抃足輒裁賀語併控謝忱名在惡子之中敢
廢南豐瓣香之敬門無行媒之迹亦甘師道三徑

之荒

通武岡虞知軍

衡

仁侯出牧和氣先驅黔之嶺巫之碯地稱樂土軫
之旁鶉之尾天假德星謹藉雙魚候迎千騎恭惟
某官人門具美風調不羣利器盤根縣最茂朝歌
之長清談繁靈蒙聲稱祕監之孫從容再轉之丞
恬退一麾之守惟武岡之矯矯晉數茂洪若文儒
之申申唐推公綽考之近比尤不久留吳公治平
之勲甫簪筆而持橐呂侯詳刑之命又攬轡以登
車我公來合於左符此事即探於右契湘水如舞

暫迎五袴之來嶽雲既開又趣雙旌之入某頃因
退鷁及識匿犀何幸宣州主人之來將有黔中上
佐之託惟是箝尾以涉筆偶然越俎而代庖茲僭
修副貳之恭非強附交承之好除道路而迎太守
願亟驅畫隼之旟封府庫以待將軍庶早反屠羊
之肆

謝綿州虞知府

普

將指非材連需章而析免陳情未達勤巽命之重
申力不足以回天錢何從而流地游蒙問勞祗重
悚慚恭惟某官才應時需美全世濟連擁雙旌之